



雞峙王

舊年个年下，同姐仔兩儕人在菁園肚圍起籬笆，等到四周圍都裝好勢，俚等就畜起幾下隻雞仔。

初下驚這兜雞仔涿著雨會凍著，就做地一間雞峙仔分佢等屏雨，順續也方便餵飼料。一段日仔過後，雞仔大隻地！三不時就看得著雞公仔在園仔肚操雞嫲，輒常就搥到雞嫲咯咯咯、走都無哪去。有時節，連俚等去餵飼料都會看著雞公仔雄繃繃仔，翼仔肱開開就像愛同人相拚樣仔。

看等園仔肚个雞仔，黏時就分俚恁起還細在屋下邊脣，阿婆乜有畜幾下隻雞仔。該兜雞仔係用來過年過節刷地愛敬伯公，係無就敬祖公个。該下俚還細，有時節在屋簷下寮，無細義還會分雞公仔啄，該尖尖个雞喙啄啊來，還痛哦！係愛同佢等逐走，佢等還正式共樣翼仔肱肱，想愛相打樣仔。

等到過年過節愛刷雞仔个時節，阿婆總係先同菜刀掙利，等到佢行入雞峙愛扭雞仔个時節，該兜會啄個雞仔黏時就撥等翼，走到無哪屏命。等阿婆同雞仔捉好，佢喚俚同佢搵手搭等雞翼同腳。該時節，俚看等佢在雞頸根掙毛，用菜刀割過雞頸後，一隻本成看起來盡雄頭个雞公仔就毋會停動地！

阿婆掙等雞毛，佢就緊教等俚，做人千萬毋好像雞公仔樣仔做一隻雞峙王。閒常時蓋像盡會、盡雄頭，鬥雞嫲一等會，結果到頭來堵到事情地，就淨曉得走分人逐，一息解決事情个本事都無。就像該隻分佢刷个雞仔共樣，連保護自家个才調都無。其實在該時節，還細細个俚聽毋識麼个安到「雞峙王」，就淨有聽入阿婆交代个，做人定著愛有本事，毋單淨做毋得鬥自家人，又還愛做得保護屋下人正好。

今這下，自家既經成家，有自家个頭路同家庭。下班抑係放棄去菁仔園餵雞仔个時節，俚就會恁起頭擺阿婆个交代。吾个細姪仔同俚共下去餵雞仔个時節，俚會講起頭擺吾阿婆畜雞仔个故事。有時節看著幾隻雞公仔在園仔肚掛長頸、大嫲聲喊：「哦！哦！哦！」該聲說聽起來有力，看佢行路个格式，實在會分人覺著佢幾有能力。有時節有過大隻个雞公仔會行前來，想愛啄吾个細人仔。俚就會教佢等，雞公肱翼開來毋使驚佢，佢無麼个本事，就淨曉得假做蓋雄頭來嚇人。等到正式愛對佢仰仔个時節，看佢就淨曉得走分人逐。

臨暗去菁園肚，看著自家畜个雞仔，涼凉个風吹過來，俚就會恁起阿婆教俚个，毋管時代仰仔來變化，雞峙王个故事本本還在。

作者：陳志寧

☆詞彙學習☆

【菁園】qiang' ian'：檳榔園。

【屏】bian：躲。

【操】cau'：拼命追逐。

【咯咯咯咯】gog gog gog gog：雞叫聲。

【雄繃繃仔】hiung' bang' bang' e'：雄赳赳的樣子。

【祖公】zu' gung'：祖先。

【喚】von：叫、吩咐。

【掙毛】cad' mo'：急速的拔毛。

【雄頭】hiung' teu'：雄赳赳的樣子。

【聲說】sang' sod'：聲音。

【格式】gied' siid'：姿態、樣子